

論語

論

語

論語序

敘曰漢中壘校尉劉向言
魯論語廿篇皆孔子弟子
記諸善言也大子大傅夏
侯勝前將軍蕭望之丞相

言
一
韋賢及子玄成等傳之齊
論語廿二篇其廿篇中章
句頗多於魯論琅邪王卿
及膠東庸生昌邑中尉王
吉皆以教授故有魯論有
齊論魯共王時嘗欲以孔

子宅爲宮壞得古文論語
齊論有問王知道多於魯
論二篇古論亦無此二篇
分堯曰下章子張問以爲
一篇有兩子張凡廿一篇
篇次不與齊魯論同安昌

侯張禹本受魯論兼講齊
說善者從之號曰張侯論
爲世所貴包氏周氏章句
出焉古論唯博士孔安國
爲之訓解而世不傳至順
帝時南郡太守馬融亦爲

之訓說漢末大司農鄭玄
就魯論篇章考之齊古爲
之註近故司空陳羣大常
王肅博士周生烈皆爲義
說前世傳受師說雖有異
同不爲訓解中間爲之訓

解至於今多矣所見不同
互有得失今集諸家之善
記其姓名有不安者頗爲
改易名曰論語集解光祿
大夫關內侯臣孫邕光祿
大夫臣鄭冲散騎常侍中

領軍安鄉亭侯臣曹義侍
中臣荀顗尚書駙馬都尉
關內侯臣何晏等上

學而第一

何晏集解

子曰學而時習之不亦說
乎有朋自遠方來不亦樂

乎人不知而不愠不亦君
子乎有子曰其爲人也孝
弟而好犯上者鮮矣不好
犯上而好作亂者未之有
也君子務本本立而道生
孝弟也者其爲仁之本與

子曰巧言令色鮮矣仁曾
子曰吾日三省吾身爲人
謀而不忠乎與朋友交而
不信乎傳不習乎子曰道
千乘之國敬事而信節用
而愛人使民以時子曰弟

子入則孝出則弟謹而信
汎愛衆而親仁行有餘力
則以學文子夏曰賢賢易
色事父母能竭其力事君
能致其身與朋友交言而
有信雖曰未學吾必謂之

學矣子曰君子不重則不威學則不固主忠信無友不如己者過則勿憚改曾子曰慎終追遠民德歸厚矣子禽問於子貢曰夫子至於足邦也必聞其政求

之與抑與之與子貢曰夫
子溫良恭儉讓以得之夫
子之求之也其諸異乎人
之求之與子曰父在觀其
志父沒觀其行三年無改
於父之道可謂孝矣有子

曰禮之用和爲貴先王之
道斯爲美小大由之有所
不行知和而和不以禮節
之亦不可行也有子曰信
近於義言可復也恭近於
禮遠恥辱也因不失其親

亦可宗也子曰君子食無
求飽居無求安敏於事而
慎於言就有道而正焉可
謂好學也已子貢曰貧而
無諂富而無驕何如子曰
可也未若貧而樂富而好

道

禮者也子貢曰詩云如切
如磋如琢如磨其斯之謂
與子曰賜也始可與言詩
已矣告諸往而知來者子
曰不患人之不知患不
知人也